

IBERU

Iberu Yeneke Wia Wetekane Pipia

Akolaline Mana Etenane Peku Noa Tanemo

1 ¹Namolo papete Akolaliyo tone kaua-mikitame one agale yakamotoapa one agale tqawea akane ali-kiti i i wa akamene wa ele kule toa wene takama-kala nekeneya. ²Nitaneyake wipitikome manago i i wa akapoano pa wa wetekakale itonoke nokome etenanemo-kama i i wa toto yatene-pala tqaweaakananya. Etenane peku nootokoa tibu itonota latia piane agome nitaneyaya. Tibu itonota ludu pia kawa tokoya peyapa nekeno, yopikoa-kala kamene wa etename moa kakane ago kekutu. ³Einagome Akolali p̄a tootapeneyaya mekome lawetane peku noa tagatapeneyaya. Nitane ago tokome Akolali kako toa kotuke-kama kako. Tibu itonota ludu padaya padaya peya pia kawa tomotoapa one tele tane agaleme-kama yopia meko. Nitiko agopa ali atoa tone poanele tokooke tuumotokome a tibuke wa ate wakapea pome ako odene meko ago Akolaline nimini yono lono witipitoa meaneyaya.

Mana Agome Edelo Ali Peya Moa Patukako

⁴Akolaliyo one edelo ali peya keku kakoa einagopa ako ago kakoa taneyaya. Nipa einagopa one mana wa ibini oapa one agale aua yaki yatene keku ibini oa edelo yatene wa ibini oa taneyaya. ⁵Nitikome okome *i ago nepa anu manago. Opi nopa neketai i kakene uku wa akeneyaya.* Nimopa edelo ago odene-palaka wamokomeke mana Keraisu-pala akeneyaya. Ni Akolaliyo one edelo ago odenekeka eya wa wameneyaya.
Nopa i agono etene kawadene tuku. I agopa anu manago kawademe toko.

Nimopa edelo ali-kitike wa wamokomeke Yesuke akeneyaya. ⁶Nika one mana namolo ago itonoke moa wetekademe kakome eya wa akeneyaya.

*No Akolali anu edelo ali peya i agoke lukoa mea neuwe tukua meoi wa
akenuya.*

⁷Wa Akolaliyo one edelo ali-kitike ikilepa eya wa akenuya.

*No Akolaliyo anu edelo ali-kitipa anu agale oa aua yamotoane tekene
pupulege keneya latiane ni anukule takama yamotoane tekene toe
itipono keneya latiane tuku wa one pupu yene moa kakanuya.*

⁸Nitaneyake one manago moa kakakomepa eya wa akenuya.

*I ago nepa Akolali. Tibu itonota ludu pia kawa tokoya peyapa neme
talo toa-kala kama poko. Nitoa talo toa mekilepa kiyoke-kama talo
toa meko. ⁹Nitoa epetaneleke-kama wene piitikaneya meapa poanele-
kiti peya kote tokolo kotimi yoa meko. Nitoa mekokepa no neketai
Akolaliyo ne takoane motekene eya tokouna. Neke oya yene keku
kamotoane ne ako moane kakakilepa ne wedoane wedikoane tokouna
wa akenuya.*

¹⁰Eya waka akenuya.

*Namolo namolo tititikake ne Ali Munoyo itono latia pia neke yoname
tibu latia tokana. ¹¹Tibu itonota takoa pootapekaleka nepa pa mea
kama poo. Tibu itonotapa mamina kego noma pou toa keneya wetini
toma pokaleka neme eya too. ¹²Tokoo kakene mamina kotokoa tukua
piitikoa weneya mamina moa kawou toa tibu itonota wawa weneya
latia pioo. Nitatekoyake nepa papete mekana toa pa mea kama
pekepa wetini toma poamoo wa Akolaliyo mana Yesu-pala akenuya.*

¹³Akolaliyo mana-pala eya waka akenuya.

*Nepala poi teia meki-kiti kawikama pone neke kawane moane pitikoi
tou. Nitouno, anu nimini yono lono noke nepia menamene wa
Akolaliyo Yesu-pala akenuya.*

Nitaneyake one edelo ali odene-palaka edikoa akenuya mena.

¹⁴Nipa edelo yatenepa edane yatene patu. Eni yatename Akolalinle
takama piki. Enipa Akolaliyo one toa moateko-kiti toto auapeatino poe
wa wetekakolo auapenokala tiki. Nipa tone leneme enamoko yenameke
tibu mea note auapenokala tiki.

Akolaliyo Toto Toa Motikilepa Padele Tubeles Tokome Tanemo

2 ¹Keraisus einagopa edikane agono, eya tato wane uku. Toto etepea
pokaya tokolo tone yakoa motokoonakale wedoa toa pikoa meato.

²Papetepa edelo ali-kitane agale tetekane yene peya Akolaliyo kibu
mokala taneya. Nipa einagale litia tootapeamedikiyake padele kateko
toameadiki wa kibu mokala taneya. ³Opa mana agome tubeles tokome
ali atoa toa motanemodo totome yakamadete wakolopa Akolaliyo wedoa
kibu moo. Kibu moamomota tekete manika petoa pomotoa-pe. Ali
atoa toa moatekamopa Ali Muno ago oneme titia tqawea akenuya. One
eni okale yakane yenamepa einapa nimini eni akedeko wa toto-pala oa

mekala tokoi.⁴ Onekemo eni oa aua yakoika Akolaliyo ali atoane wene kainya pikanele ele kule tubele witakakala toka. Nipa ekee, Akolaline tele patu kautakoa kakete ikino, nimini eni akediki wa totome yakoa momotoa toka. Nitimotou wa Akolaliyo eyaka toka. Ele kule toatekoo peku tutu tutu wa lawetekamota one Epetane Yomini totoke moa wetekaka. Nipa one wene litikome toka.

Toto Toa Motane Agoke Akenemo

⁵ Akolaliyo weneya itono latiateka wene toopia mekomepa edelo ali-kiti kime yopiamene wa yamepianeya mena. Ali atoame yopiatekoi wene toopianeyea. ⁶ Nikepa Depidiyo Akolali-pala eya wa akeneya.

Ae, toto pa keku mekono, edeyake neme wene taneya meko-pe. Totopa pa ali atoano, dekolo mama moa meko-pe. ⁷Neme ali yatene latikilepa pa nateyame edelo ali yatene ako kakoapa ali yatene keku keneya kakoa toka. Nitoke pa teleta tootapeneyea muku toa meamene wa ali yatene kei wedoa pika. ⁸Nitoapa paduya paduya peya yopia kamene wa neme ali yatene yamepika wa Depidiyo Akolali-pala akeneya.

Padeya paduya peya yopia kamene wa yamepianeyake ikilepa odenyaka katekamenyea peya kikilikoa yamepianeya wa okome akeneya. Peya yamepianeyake opa ali yatename paduya paduya peya wete yopikoa kawameadiki. ⁹Ali yatename paduya paduya peya wete yopiamikiyake Yesu taatekoa nome yopia-kala kako. Pa nateyame edelo ali-kiti ako kamotoa Yesu einago ali latia itono nekeneya. Enipa Akolaliyo ali atoa pewe wiateka wene toopiane toa taatekoa tokome ali atoa toto peyake tuaneya. Nitikale tokome Akolaliyopa one a tibuke pa teleta tootapeneyea muku toa ne meamene wa one kei pia kakeneya. ¹⁰Padeya paduya peya latitikoa yopia-kala meko ago Akolaliyo one mana kono-mikiti peya mati one pa tootapeneyea mekuta nomotou wa eya taneya. Nitou wa oa pikana toa taatekakomepa mana Yesuyo tete moa kamotoa itono moa wetekamedekale moa wetekaneyea. Nipa toto toa moateka ka patekane agome poanele padeleka toameneya mekome onekele takoa togateka kotu kakoa tomotoa nitaneya.

¹¹I ali atoapa Akolaline takoane motekene tuku wa tone poanele kogataapea tuane agoka eni ali atoa totoka Akolaliyo odene yatene ali atoa tetepo takoa meko. Nitikono, Yesuyo totopa onekameyo wa amene ya motokoya mena. Ni edoa-mo. ¹²Yesu einagome etene Akolali-pala eya wa akeneya.

Atai Akolali ne ko ikilepa anukameyo-pala ou. Ne kowitadete koukoa mekoi peyane lene yoto kakene ne kei piane kawou wa akeneya.

¹³Eya waka akeneya. *Akolalike-kama wene tugoane meou wa akeneya. Nimo ootokoa kakome okome Akolaliyo no yametekana mati-kiti-pala i opiane kakene uku wa Yesuyo akeneya.*

¹⁴Akolaline mati-kiti wa akene yene totopa tone kaua-mikitike tama noko toa Yesu einagoka tono melepu kakeneya nikilepa ali atoa tukina toane oneka tuou wa nekeneya. Nipa ali atoa tuatiki peku laweteko ago Setanu moa kawikademe eni nome tuaney. ¹⁵Nipa ali atoa toto tukaya wa piti motaneya-kama meko take eni nikilepa piti takoa wawano, atiki toa poe wa toa moademe nekeneya. ¹⁶Nitane agome edelo ali-kiti auapekoya mena. Eberameke tagene ali atoa toto auapekoya. ¹⁷Nitadene kei ali-kitane yagono ago latitapeneyea meamedeku wa tono melepu kakeneya nikilepa eya toademe nekeneya. Ali latitapeneyea mekomepa ako odenemekome lodo yotokako ago tou toa ali atoa ela mati motokome Akolalinele wedoa takademe nekeneya. Nipa Akolaliyo ali atoa tone tokoo poaneleke po letu mekakana keemu toa wene keaneyea memotoa tokome totoke tuademne nekeneya. ¹⁸Itonoke eni nome mekale Setanuyo likoa enoai tokale ke enekakale meaneya. Nitaneyake Setanuyo likoa eneko-kitipa oneme wene toa auapeko.

**Yesuyo Ali Atoa Toa Motikilepa Moseseyo
Tane Toa Moa Patukakome Tanemo**

3 ¹Nikepa anu oya-lawe no tukuna toa Keraisunole takama yaki-kiti kipala eya wane uku. Akolaliyo kipa one tibuke noatino noe wa kayo akene-kiti Yesuke-kama wene piitikaneya meamene. Ako odenemekome lodo yotokako agome tou toa one wene kekamotoa teke onekemo akapoano pa wa Akolaliyo moa wetekane agoke uku. ²Yesu einagomepa one moa kakakanakagome tamene wa okana toa-kama tokala taneya. Nipa papete Moseseyo Akolaline yapu yopikou toa Iserele yatene yopikome toateka toa toa togataapeane toa taneya. ³Nitaneyake Akolaliyo einagota kei pikilepa Mosese keku ago tetepo takoa Yesu etene ako ago tetepo takoa toko. Nipa yapu-kiti epetaneyea kakale eneketepa i yapupa epetaneyea wa totome kei piketeke yapu wiko ago kei wedoa piko toa toko. ⁴Yapu pade wianeya kakale eneketepa panago i agome wianeya wa oko. Eya kuya pia kawa tokoya peyapa Akolaliyo-kama latianeya. ⁵Moseseyo Iserele yenepa Akolaline yapu tetepo takoa mekome pa pupu agome tou toa one eni yapulu yenanele wedoa takoa meaneya. Nipa Akolaliyo naniko oatekamo Mosese einagome i i wa papete toawea akaneya. ⁶Keraisu taatekoa nokome Akolaline yene talo toa meaneya. Nipa yapu pinagomo mana tokome etename okana toa-kama tootapeneyea. Nitane agome wipitikome pewe witikale nepia meato wa onekele atiki toa takoa togaketepa one yapulu yene too.

Ko Memotoa Yametane Take Poatekomo

⁷Kipala ina ukulekepa Epetane Yominiyo papete oa piane toa litia tamene. Eya wa oa pianeya.

Opi Akolaline agale yateketepa⁸ kolotini lupi tootokaneya meameamene. Papete kini kaua-mikiti ali piامene ta ludu yaketepa no Akolaliyo tokale enato wa anu agale yakamene kote tokale wakala tokoi, kime pade nitameamene.⁹ Kini kaua-mikitame edikoa no toa enekala tikilepa mali padeka noi kakoa (40) ponoka toane ele kule telekole tokoule eneketeke tokoi.¹⁰ Nitikoli eina yene-pala wene poaneyea mekene ekene i yenepa kini wene piki toa litia etepea-kama yaki. Nipa anu wene pikule litia toamiki wane okou.¹¹ Nitokane kotimi yotekene ekene kiwi ko meamene wane yametekouna take nomotoane wamuku wane okou wa Epetane Yominiyopa Akolaliyo okamo yakoa akeneya.

¹² Anu oya-lawe kini tepene Akolaline agale yakamatiki poane wene witakomepa meemoa poko Akolali tewitikoa etepea pokayano, wedoa meamene-ye. ¹³ Nipa ele kule poanele tekete kini wa oa yotokoa kolotini lupi takakaya tokale ta pataka abuna ete oto wa auapea mane oa moma pamene. Naniko mena. Akolaliyo ipete wa metane oi taatekako-mene nitamene. ¹⁴ Keraisuke pegetoa wene tugoa mekoona toa wedoa wene tugoa mea togaketepa nipa Keraisuno yapulu yene too. ¹⁵ Akolaliyo akene toane ina wianemekakumopa lokoane ukuno, yakamene.

Opi no Akolali anu agale yateketepa kolotini lupi tootokaneya meameamene. Papete kini kaua-mikiti ali piامene ta ludu yaketepa no Akolaliyo tokale enato wa anu agale yakamene kote tokale wakala tokoi. Kime pade nitameamene.

¹⁶ Akolaline agale yakatekoapa litia tamene kote tokale wakilepa mani yename taneya-pe. Moseseyo Idipi ta tewitikoa pato wa aua pekene yene peyame nitaneya. ¹⁷ Akolaliyopa mali padeka noi kakoa (40) ponoka toa kotimi yoa mekilepa mani yatene-pala kotimi yoa meaneya-pe. Ali piامene ta ludu ele kule poanele toma yakene yene-pala kotimi yoa meaneya. Eni yenepa eni ta ludu yawa tukolokaneya. ¹⁸ Ni Akolaliyo i yenepa kiwi ko meamene wane yametekouna take nomotoane wamuku wa yono timini mukitinike pitikou toa ikilepa mani yeneke akeneya-pe. One agale tagoa toamene yeneke akeneya. ¹⁹ Nimo akeneyake totome eya wa wene toko. Eina Iserele yename Akolaline agale yakamadete wakete tekete eina yametekana ta lobutua pamele toameneya.

Akolaline Ali Atoa Ko Meatikimo

4 ¹ Akolaliyopa kini ko mepatiki taapa i wa yamepianeyea. Kiwi ko meatiki wene wia wawamokono, kiwi pade pata paka pokaya wa piti motaneya meamene. ² Eina epetane ko totome yatekilepa tone kaua-mikitame papete yakanemo eni yatekoo. Eina yename yateketekete Akolalike wene tugamekete tekete pata pale toa yakaneya. ³ Nitaneyake Akolalinemo yakatekooa oneke wene tugakoo-kiti totopa one ko mekota

oyake lobutua pamele toko. Nitamele tokoyake oneke wene tugamene-
kitike Akolaliyo eya wa oa ka ketekaneya.

*Yono timini mukitinike pitikou toane eya wane kotimi yoane meane
tukakou. I yene kipa no komekouta etene lobutua nikileka toamoi
wa akeneya.*

Tibu itonota latia mea peya takane-pete laigoa one ko meemoa nokomeke
akeneya.⁴ Akolaliyo tatono (7) takoa ta patakale tanemoke one bokuke
panagome eya wa wia mekaneya. *Tatono (7) takoa ta pataka-pete*
Akolaliyo one pupu toa peya takatekoa ko meaneya wa wia mekaneya.
⁵ Akolaliyo tone kaua-mikitike akene toa eya waka wia mekaneya piko.
No ko-kama mekouta nikileka toamoi wa wia mekaneya.

⁶ Ali atoa padeka-kiti eida pote mepatekoiyake onekemo namolo
yakane-kitame yakamadete wakete tekete pote mepameneya.

⁷ Nitaneyake nani mati Akolaliyo ali atoa padeka-kiti eida ko mepatekoi
oipa ipete wa pade oi metekome akeneya. Nipa Depidi-pala okome
okome *ipeteka no Akolaline agale yateketepa kini kolotini lupi tootokaneya*
meameamene wa akeneya.

⁸ Namolo namolo eya ago Yosuayo Iserele yene ko meatekoi take aua
poo tokapa nipa Akolaliyo Iserele yene kini ko meatekoi-petepa ipete wa
oi pade naniko meamoo toka. ⁹Eina oi taatekoा noka-pete one yene toto
Akolali-pala ko meamele too. Nipa Akolali tatono (7) takoa ta patak-
pete laigoa ko meemoa nekene toa nitamele too. ¹⁰Akolali ko mekata
poka agomepa nipa one pupu tewitikoa wawa poo. Nipa Akolaliyo papete
one pupu toa peya takatekoa ko mea-kala kako toa nitoo. ¹¹Tone kaua-
mikitame Akolaline agale yakamadete wakete etepea pekene toa toto
padeka-kiti pata paka etepea pokayano, eida ko meemoa pouketepa wili-
kama tokoa katoane uku.

¹² Akolaline agalemepa yomini meaneya tou toa ele kule telekole
tokala toko. Nipa eka okata olo kakene tueme-kiti tono puou toa aline
wene yominita oyake moa leteamele toko. Ele kule toada wa tone wene
pikole-pala tetoa enetaapeamele toko. Nipa peyane tepene piko wene i i
wa keleyo yameamele toko. ¹³Akolaliyo latikanakeya odeneyaka oneme
enekaya kekoa potipiamele toamokolo uku. Einago tone koiso pitia
yakateko agomepa padeya padeya peya keleyo-kama enetaapeko.

Keraisuyopa Ako Odene Mekome Akolaline Wene Kekakanemo

¹⁴ Ako odene mekome Akolalike lodo yotokako ago tou toa ibini akene
ago Akolaline mana Yesuyo tone kowitikademe a tibu patukataapea
etene mekota pome mepaneyano, Yesu einagoke wene tugoane meku wa
pegetoa tqawea oa wene tugoane mekoona toa oneke wedoa wene tugoane
meemoa patoane uku. ¹⁵ Ako odene mekome Akolalike lodo yotokou toa
kowitikako agomepa i ali atoapa taba ali atoano, waye wa Akolaliyo

yakakoa tone kowitikakala toko. Nipa Setanuyo ali atoa toto likoa eneko toa oneka likoa enaneya tokome toto mama moa kowitikakala toko. Nipa likoa enoai tokaleka poanele padeleka toamene agome toko. ¹⁶Nitikono, ali atoa pewe-kama witikago Akolali one mekoya liti pote kapamele toko wa one lenike atiki toa kakete kowitatoane uku. Ke enekakale mekoo-pete-kama toto ela motokome auapeoono, nitatoane uku.

5 ¹Ako odene mekome Akolalike lodo yotokamotoa takoa motane ali-kitike uku. Dikako ago tukale one luku panago moa kakakilepa Akolaliyo ete ali-kiti takoa wawa odene ago takoa moa kakako.

One yatene ali atoame tokoi poaneleke padeya-kiti mea lodo yoa kowitikamotoa ni toko. ²Einagomepa wene toamene ali atoa etepea pote poanele tokoike lodo yotokakilepa ae kime tiki toane onemeka poanele tuku wa eni yene mama moa toko. ³Nipa Akolalike lodo eni yotokakilepa oneka poane ago tokome pinali one poanele tokake lodo yokala too.

⁴Nipa one weneme ako agomekene tou wa tokoya mena. Akolaliyo takoa moa kakane ago tokome ni toko. Nipa papete Akolaliyo eya ago Erone takoa moa kakakale mekome tane toa toko.

⁵Keraisuyoka ako odene mekene enakale tou wa taneya mena. Nitaneyake Akolaliyo one-pala eya wa akeneya.

I ago nepa anu manago. Opi nopa neketai latiane meku wa Akolaliyo mana-pala akene toa panagome one bokuke wia mekaneya.

⁶One boku padeke Akolaliyo mana-pala eya waka akene toa padame wia mekaneya.

Anu wene kekakadepa lodo you toa teke ali atoane kowitikama poo.

Eya ago Melekisedekeyo papete tokana toa nemeka too wa Akolaliyo akeneya.

⁷Yesu tono melepu eya kakeneya itonoke nome mekome Akolali kowitikilepa komo kąta oa kakome taneya. Nipa one tukale moa kamotokatekago kowitaneya. Nitoa yoti mitikateko mekome kowitikale tokome Akolaliyo yakoa taneya. ⁸Keraisu einagopa Akolaline mana kakilepa taneyake etename oka toa-kama wene toa litia tootapeademepa ele kuleme ke enekakale mekome poti utanele-kama toomoa pekeneya. ⁹Nitoapa etenane wene pika toa kotuke kakoa tootapeneyea tokome one agale yakoa tiki peyapa one patu kautakoa kakete mea kama pamele toko wa toa motoko. ¹⁰Nitikago-pala Akolaliyo okome one wene kekadepa lodo you toa ako odene meke ali atoane kowitikama poo. Melekisedekeyo papete tokana toa nemeka too wa Akolaliyo mana-pala akeneya.

Yesunole Takama Peketepa Pegene Kakoa Tewitikoa Wawameamene

¹¹Kipala ina ukuna i i wane oane togatekuyake kini yakaniki toane pine ina ina wane amele toamokolo waku. Kipa tugi ootapeneyea mekili tekene ni uku. ¹²Kipa Yesuke wene tugakilepa wete mati titia tokoina.

Nitikoina tekete eko ali atoa oyake olaukamedikiyake Akolalinemo pegetoa olaukanemo wene kayapeaneyea mekino, panagome kiwi wa olaukamedeko. Ae, nana matiyame keneya ipe kakoya nee eya noameneyea adu-kama nou toa Akolaline agale wedoa yakameneyea meki.¹³ Panagome-kiti adu-kamado nakomepa nipa nana matiyame tokole eni toko. Einagome ali atoa wene kiyo akeneya mekete toatekoile olaukanemo wene toamoko.¹⁴ Wa panagome-kiti Keraisunomo yakoa motokomepa nipa ipe kakoya nee nako agome tokole eni toko. Nipa Akolaline agale pine piko toa pitia enekala tokoya tokome epetaneleka poaneleka wene toa tetoa eneko.

6 ¹Keraisunomo nana mati olaukou toa pegetoa olaukanemo-kiti totome adekoa yatekoo. Eya wa olaukanemoke uku. Tone namolo pale tokoonakale tewitikoa wawa Akolalike wene tuga meatekoomo² ni ue moatekoomo ni tobou waneke yono pia kowitatekoomo ni Akolaliyo tuane ali atoa moa kamotokatekamo ni poanele toma pokoi yene poane take mea kama poe wa Akolaliyo koiso akatekamo enika enimopa totome adekoa yatekoono,³ Akolaliyo ka yametekalepa Keraisunomo emo kumo peya yakoa moateko toa yakoa moato.

⁴Keraisunomo yakoa mootokoa onekele takoake wakoi yenepa kini poane wene wia wawe wa panagome edoa wa mane mane omotoa-pe. Pegetoapa eni yene p̄a takalogou toa Akolaliyo pewe witikome one peku noa toatino toe wa lawetekale Epetane Yomini awia nome menaneya.

⁵ Nitane yename meke tane nee nou toa Akolaline epetane agale yakoa ni one weneya tibu itonota talo tokome telekole toatekale nami enoa taneya.

⁶ Nitaneyake kote tokolo wawa etepea peketepa nipa Akolaline manapa yomo lekaneyake wa lokoa wia dekou toa tekete tiki. Nipa ali atoane lenike wa tegene matou toa tekete tiki. Padameka eni yenane poane wene wia wawatiki ka i wa lokoa yameamele toamoko.

⁷ Itono pikoka-kiti ta pitakala tokolo ko akaneya pikolo tokome pinagono noa meateko nee wedoa witako. Nitikoka Akolaliyo pewe wia yopiko. Enipa Akolaline ali atoa totoke uku. ⁸ Wa pade itono pikoka tonipo paya ke eya witakopa nipa tonipo pitaneya tokome Akolaliyo pewe wiamokome poanemo oa wako. Nitoa wipitikome toeme nomotoa wawademe toko.

⁹ Anu kolotini yene kiwi edikoane pubu oane pedoane agale ukuyake kipa tonipo pitane itono keneya wane wamuku. Akolaliyo kiwi pewe wia togakomepa toa moademe tokono wene tekene ni uku. ¹⁰ Akolaliyo kini tikile pitia enekilepa kiyoke-kama toko. Nitikono, kini wini epetekoa toma yakile oneme wene kayapeamoo. Oneke wene mekoaa mekete tekete one wa takoa motane yene auapekoina toa wida pa auapekete tikino, Akolaliyo wene kayapeamoo. ¹¹ Kini papete epetekoa toma yakoinakale kiwi peyame wedoa toa togamene wane uku. Nipa Akolaliyo kiwi pewe

witikome auapeoo wa one eni tokale kime nepia mea enemotoane ni uku.
¹² Onekele kote au kenya moa takameamene wane uku. Kiwi yatene auapekene dikou wa Akolaliyo papete oa togotokana toa taatekooa tokale nepia mea enemotoane ni uku. Nipa one wipitikome meatekoya-kiti moato wa oneke wene tuga mekete poti nepia mea togaki-kitame tikile kotukoa toma pamene.

Akolaliyo Oa Pianele Etene Taatekoaa Too

¹³ Akolaliyo ne auapekene ile tou wa Eberame-pala oa pikilepa one eni agale tele takakome pinali one ibini wedekakome akeneya. One moa patukoa ako kako agoka kawamokale tokome pinali one ibini wedekakome nitaneya. ¹⁴ Nipa *ne pewe wiane kakilepa neeke ali atoa peya mati tama pomotoane tekene tou* wa oa togotaneya. ¹⁵ Nitikale Eberameyo ee nimini oko wa poti nepia mea kakakoa Akolaliyo tou wa one-pala okana toa taatekoaa taneya. ¹⁶ Panagome-kiti ile tou wa one agale tele takakome ikilepa one moa patukoa ako meko agono ibini wedekoa okala toko. Koisoke-kiti kakome i i wa aka ago padane ibini wedekakome okalepa ete-kitame ee nimini oko wa one okomo yakoa motiki.
¹⁷ Akolaliyoka kiwi auapekene ile tou wa one yatene-pala ikilepa one ibini wedekakome akeneya. Nipa one eni toateka wene wia wawamoo wa wene tomotaaneya. ¹⁸ One eni toatekale toto poome toameneya nepia memotoa tokome Akolaliyo takutale eni taneya. Ile tou wa one kabunume oa pia ni pinali one ibini wedekoa oa taneya. Niletanelepa kapene wakamele toamokolo tokome one wene wia wawamademe toko wa oneke poti lukoa meadete toa pokoo-kiti totome amele toko. ¹⁹ Nitoa Akolaliyo wipitikome toatekale wedianeya nepia mekilepa ue dipi-kiti mabo kakeneya waname uele lauaneya piou toa poapeneya nepia meko. Nipa tone yomini meaneya etepea poamomotoa tokome Keraisuyo eya taneya. Tobou losu yapu keneke Akolali meko lono wa ibini akene yapu luku olege tane mamina patetoa pome kawou toa a tibuke pome meko. ²⁰ Nitoa toto naniko nomotoa Yesu eni namolo takoa pome mekome tone kowitikako. Nipa aka odene mekome Akolalike lodo yotokoai tane ago Melekisedeke einagome papete tane toa tone kowitikoa-kala kama pokoo.

Akolalike Lodo Yotane Ago Melekisedeke

7 ¹ Melekisedeke einagopa namolo namolo Saleme ta tobou ago mekome aka odene meko Akolalike lodo yotokoai taneya. Nitane agome eya taneya. Eberameyo one-pala poi tejane tobou ali-kiti litimoa pome wia atukamotokome wakapea nokale kotupokome Akolaliyo ne mea epetekamotoane uku wa makutukoa motaneya. ² Nitikale Eberameyo eni tobou ali-kitaneke wia motokanakeya-kiti moke tikilepa

lu takutake odeneme pakitikoa-kala (9) one pikome odene ipa neke wa Melekisedekene pikakala taneya. Tone agalekepa tobou ago Melekisedekene wapa kiyoke-kama yopia epetekako ago wa ekete oa ni Saleme tobou ago wapa ali atoane tepe kolotini kilikoa pikoa yopiko ago wa ekete oa too. ³Einagopa one etene ninetapa i ago i atoa wa padameka wene toamoa ni one kaua-mikiti i i wa wene toamoa tiki. Ni one opiane-petepa ipete wa padameka wene toamoa ni one tukilepa ipete taneya wa wene toamoa tiki. Ni agopa Akolaline mana keneya mekomepa ali atoame Akolaline totono tetekaneleke oneke lodo yoa wene kekakoa-kala kama pok.

⁴ Melekisedekene einagopa nitane ago-yo. Toto Yu yatene tagaane ago Eberameyoka poi keneke tobou ali-kitaneke wia motokanakeya-kti moke toapa lu takutake odeneme pakitikoa-kala (9) one pikome odene ipa neke wa Melekisedekene pikakala taneya. Nipa einagopa etene ibini akene ago tetepo takoa nitaneya. ⁵ Nititikaneyake Moseseyo one totono yametekome tamene wa akene toa tekete Akolalike lodo yotokamotoa moa kakane Lipai yatene ali-kitame eya tiki. Malikeka ete Yu yatene-kitame kini kamoya eya moke toapa lu takutake odeneme pakitikoa-kala (9) kini wa pikete odene katekamo Lipai ti kinino moati wa pikakala tomotoa tiki. Ete yatene-kitika odene ago Eberameke tama nekeneyake tiki. ⁶ Papete Melekisedekene einagopa Lipaike tagene ago menake Eberameyo einakeya-kti lu takutake odeneme pakitikoa-kala (9) one pikome odene katekamo Melekisedekene pikakala taneya. Akolaliyo ne auapekene dikou wa oa togotokale yakane ago Eberameneke Melekisedekeyo einakeya motaneya. Nitane agomepa Akolaliyo ne pewe wimotoane uku wa Eberame makutukoa motaneya. ⁷ Akolaliyo ne pewe wimotoane uku wa panagome-kti ikilepa nipa ako agome keku ago-pala okoya. Nipa Melekisedekene einagopa etene ibini akene ago wane ekene uku. ⁸ Opika Lipai time ete Yu yatene-kitaneke kinikiya-kti pade edikoa motikilepa nipa tuatiki ali-kitame tiki. Papete Melekisedekeyo Eberameneke padeya-kti motikilepa nipa Akolaline bokuke wia mekane toapa tuamateka agome tou toa taneya. ⁹ Nitaneyano, totome eya wa amele toko. Lipai time ete Yu yatene-kitaneke kinikiya-kti pade edikoa moatekoiyake papete Eberameyo onekeya-kti pade Melekisedekene ipa neke wa kei pikome metekilepa oneke tawateka ago Lipai-pala odeneka dekoa kei pikome meou toa metaneya. ¹⁰ Lipai einago one kaua ago Eberamene tepene meane tetepo taneyamekakoa Melekisedekeyo Eberame kotupaneyake ni uku.

¹¹ Akolaliyo one totonopa Lipai time-kama pikoa kamotou wa Lipaine mana Erone namolo takoa moa kakaneya. Eni totono litia toatekoi adekake kakoa litia tomotoa Lipai timedo ete Iserele yatene oyake olaukamele too tokapa nipa Akolaliyo Eroneke tama nekene ali-kti luku weneya ago Melekisedekene yagono ago moa kakamele toamoo toka.

¹² Nitamele toamoo tokake Akolaliyo eni totono pikoa kakene yatene wawou wa weneya ali moa kakakomepa kini pikoa kakene tononoka wakome weneya totono yameamele taneya. ¹³⁻¹⁴ Weneya alipa Yesu Keraisuke uku. Ni ago tagilepa Lipaike taneya mena. Onepa Yekobene mana pade Yudake tageneya. Papete Yuda-loeke tagene ali-kiti padameka Yu yename poanele tokoike Akolalike lodo yotokameneya. Moseseyoka Akolalike lodo yotokateka yatene i wa takoa ikilepa Yuda yatene wameneya. Yuda yatene takoa wameneyake Yuda-loeke tagene ago Yesu Lipai time tanele toademe nekeneya.

**Melekesideke Keneya Ago Keraisuyo Akolaline
Wene Kekakakome Tanemo**

¹⁵ Kipala ina okouna pine toaweane ouno, yakamene. Akolalike lodo yotokou toa one wene kekakane ago pade Melekisedekene yagono ago taatekoia nekeneya tadeko. ¹⁶ Lipai yatene ali-kitame Akolalike lodo yoa one wene kekakakilepa nipa kaua ago Lipaike tageneya tekete tiki. Kiwi luku Akolaliyo pade ago moa kakakilepa einago etene telekole toa mea kama poko ago tokale ni taneya. ¹⁷ Nitatekalekepa Akolaliyo akene toa panagome wiamekakome okome *lodo yotokago tou toa anu wene kekakakilepa pa mea kama peke too. Nipa Melekisedekeyo toka toa nemeka too wa wia mekapianeya.* ¹⁸ Namolo totono Akolaliyo edikoa katekoia wakilepa ali atoa toto auapeamele toamene totono tokale ni taneya. ¹⁹ Eni totonomepa odene agono weneka oyake moa kiyo akataapeamele toameneya. Nitamele toameneyake Akolaliyo one mekuta noatiki ka pade epetane ka ino, noatino noe wa toto yametaneya. Nitaneyake Yesu pitia poadete wedia meko.

²⁰⁻²¹ Lodo yotokakago tou toa one wene kekakoa ka patekoia yopimotoa moa kakakilepa Akolaliyo Yesu-pala eya wa oa lutua moa kakaneya.

No Ali Muno agomepa neke toateko wene toopikumo luutukoane ukuno, yakamene. I ago nepa lodo yotokakago tou toa teke anu wene kekakoa ka patekoia yopia kama poo. Neke nitateko wenepa wiane wawamou wa Akolaliyo oa togotaneyea.

One namolo totono pikoa kamota Lipai yatene takoa moa kakoaka enimopa eni yatene-pala wameneyake Yesu-pala akeneya. ²² Nimo oa togotokaneya tokome totome eya wa wene toko. Yesu einagome i wa eni ka patekoia yametekoa yopiko totonopa etene epetane mati totono tadeko.

²³ Lipai yatene ali-kitame namolo totono pikoa kakilepa peya matiyame taneya. Eni totono pikoa kawa mea tuma-kala nekeneya tokolo ni uku.

²⁴ Keraisue einago tuameneya mekome weneya ka yopia-kala kama poko.

²⁵ Nitiko ago tokome Akolali mekota poadete one yoto pitia piki peyapa oneme-kama toa mokala toko. Nipa i yene kini poanele tokoike po letu mekakana kemu toa wamene-ye wa Keraisuyo kini kowitikama-kala poko.

²⁶ Akolalike lodo you toa tone kowitikateko ti toko agopa Yesu tadekolo uku. Onepa kiyo akenele-kama toa ni ete-kitame akoa agale oatikileka toamoa ni wene moa koigamenya mea tokolo uku. Nitikagopa Akolaliyo tone poanele toamekota pilia moa etene ako tibuke ne ako ago mea wa moa mekananya. ²⁷Ako odene mekete Akolalike lodo yotokoai tane tobou ali-kitame Akolaline wene kekakakilepa ta patako abuna sipi sipi kai wia lodo yokala tiki. Nipa pinali-kiti kini poanele tokoike nami wia lodo yootokoapa ete-kitame poanele tokoike nami wia lodo yotokakala tiki. Yesuyo pade nitamenya. Poanele toamene ago tokome sipi sipi kai tetepo tootokoa pinali one wa lodo you toa tukomepa Akolaline wene kekakatapenya. Wa pade tuamoo. ²⁸Mosesene totono piane toa ako odene mekete Akolalike lodo yotokamotoa moa kakane tobou ali-kitamepa ete yene peyame tiki toa poanele tokala tiki. Eina totono yametekaneyake naniko Akolaliyo ile tou wa oa togotokanakale taatekoia tokome mana ago moa kakananya. Nipa mea epetekateka kotuke kakoa mekatapeane ago ne mea kamene wa moa kakananya.

**Ako Odene Mekome Lodo Yotokako Ago Tou
Toa Yesuyo Akolaline Wene Kekakako**

8 ¹Ina ukunapa eya wane ekene uku. Ako odene mekome lodo yotokako tobou ago tou toa tokome Akolaline wene kekoa tone kowitikako agopa Yesu tadeko. Einakagopa a tibuke ako odene mekome talo toa meko ago Akolali meko walai nimini yono lono pome mepaney. Opika eida pa meko. ²Eida mekome Akolaline yapu eteneya keneke onekele-kama takoa meko. Yapu eteneya wane ukupa alime wiane yapuke ukuya mena. Ali Muno mekotake uku.

³Ako odene mekome lodo yotokako tobou ago moa kakakilepa Yu yene peyane eya takamotoa tiki. Kini kowitikakome Akolalike padeya-kiti mea sipi sipi kai wia lodo yomotoa tiki. Lodo yotokou toa tone kowitikako agomeka Akolalike padeya meamele taneya. ⁴Ni agopa itonokedo pa mekome too tokapa Akolalike padeya mea lodo yoamoo toka. Lipai ali-kitame Mosesene totono litiapa enile tokala tikino, oneme pade nitamoo toka. ⁵Lipai ali-kitame edikakilepa one a tibuke tokole adeka pia tokala tiki. Nipa pa tekei tokala tiki wane uku. Moseseyo Akolaline mamina yapu wikakademe kakale Akolaliyo eya wa akenemoke ni uku. *Ne Kati Sainaice kake enekale a tibuke no Akolalineya adeka piane yametekounano, anu mamina losu yapu wikakakilepa eina yametekouna adeka pia wikakamene wa akenuya.*

⁶Keraisuyo toto auapekome toatekale i i wa Akolaliyo lutua yametekilepa Lipai yename tekei toatekoile yametekanakale moa patukoa akole toatekale eni yametaneya. Edikane toapa Akolaliyo ali atoa weneya totono lutua yamemotoa Keraisuyo tikilepa eina namolo totono Moses-

pala lutua yametanele moa patukoa epetane totono yamemotoa taneya wane uku. Ni edoa-mo. Akolaliyo eni weneya totono tele takakome i i wa ikilepa Moses-pala agale oa epetekakana toa moa patukoa Keraisu-pala agale wedoa oa epetekaneya.

⁷Eina namolo totonopa ali atoame kiyoke-kama litia toatekoi totono yameoo tokapa nipa eina totono luku weneya totono yameatekale pade piamoo toka. ⁸Nitatekale pade piamoo tokake Akolaliyopa one Iserele yename eina namolo totono tetekakala taneke eya wa kikoa akaneya.

No Ali Muno agome ukuno, yakamene. Iserele yatene Yuda yateneta kini weneya totono i i wane lutuane yameadene tuku. Eni toateku tigotoma noko. ⁹Eni totonopa namolo namolo kini kaua-mikiti Idipi ta tewitikoa poe wane liane auane pekene yametekou totono keneya mena. Eina yename namolo totono litia toake wakoli kote tokale wakou. ¹⁰Nitikouyake no Ali Muno agome eya waneka ukuno, yakamene. Weneya totono Iserele yatene yameatekou oi ponokalepa i i wane wene takoane kini tepene-pala lukoane tou. Nipetepa nopa kini Akolali mekene yopiou. Kipa anu yatene ali atoa nooke lukoa meoi. ¹¹Nitoa mekete panagome-kiti no Ali Muno ago ko i i wa one oya-mikiti-pala amele toamoo. Ali atoa peya ponopene ali atoameka ibini akene ali atoameka kini weneme no Ali Muno agopa dikane ago tadeko wa wene tootapeoi. ¹²Nipetepa kini poanele tokoike po letu mekakouna keane wawane wene kayapetapeou wa Ali Muno agome weneya totono yameademe okome akeneya.

¹³Weneya totono wa ikilepa Mosesene totonopa namoleya tetepo takoane waku wa okome akeneya. Nitaneyano, padefa namoleya kego noma pou toa eina namolo totono takoa poademe toko.

Meme Kai Tabeme Wikakane Yapu Kenike Akolalike Lodo Yoakowitanemo

9 ¹Akolaliyopa one Iserele yene kiwi yopiouno, dikamene wa one namolo totono lutua yametekilepa oneke lodo yoakowitanemo toatekoile yamea ni itonoke one kowitatekoi yapu wikakakete toatekoile yamea taneya. ²Eina yametane toa meme kai tabe moa yapu wikakakilepa luku takuta motokoa wikakane. Yapu luku padekapa Akolaline yapu luku wa motokoa wikakoapa eya-mene tebolo moa pianeya. Labo ni Akolaline yotokane palawe piai tane walai ni eniya palawe moa pianeya. ³Eni yapu luku kago keteponekape maminame olege taneya kakeneya. Ni padena yapu luku ali atoa kutu ponamomotoa maminame olege tikilepa Akolali meko lono wa motokakete wikakoa taneya. ⁴Eni yapu luku Akolalike padefa kalono taneya lodo yoai tane walai moa pianeya. Eni walaipa golo kueme latianeya. Ni yomome latitikoa golo kue paataapeane bokosi pianeya. Akolaliyo lutua yametane

totono adeka pia latiane bokosike uku. Eni bokosi keneke eya-mene moa lobutaneya. Golo kueme latiane mete deya moa lobutuaneya. Maana nee moa kapetekane mete deyake uku. Ni eya ago Erone one iti weneya tata pitikane iti moa lobutaneya. Ni Akolaliyo yonota tua agale wia mekane kue petenetaka moa lobutaneya. ⁵Eni bokosi patupa malikeka sipi sipi kai kamate tadekaneya. Akolaliyo ali atoame tane poanele kogamotoa taneya. Eni bokosi patupa kerubime wa ibini akene edelo alita yomini latia kakaneya. Nipa kini pawenata petene takoa liputakutukakete todo takamotoa latia kakaneya. Enika eniyake ikilepa oyake ukuno, pademo pade opi wamuku.

⁶Akolaliyo tamene wa akene toa enika eniya nodokatekoa Lipai yatene ali-kiti ako yapu lukuke-kama pote lodo yoa enile topokala taneya. ⁷Eko lukukepa aka odene mekome lodo yotokane tobou ago odene pekeneyea. Einago pikilepa malikeka odepeta pokala taneya. Paapa poameneyea. Sipi sipi kai wia kamate okolo kagonoke mekao aua pekeneyea. Nipa pinali one tane poaneleka ali atoa kini wene toamekete tane poaneleka takoa kogamotoa nitipaneya. ⁸Enilekepa Epetane Yominiyo eya wa wene takako. Meme kai eya tabeme wikakane losu yapu ako luku keneke Lipai yatename lodo yoa enile pa toomoa pililipa nipa eka luku Akolali meko lono wa ibini akene luku pa ali atoa wete ponamele toamoko wa wene takako. ⁹Eni meme kai eya tabeme wikakane yapupa toto ipete meko ali atoame toatekoole adeka pianeya. Eni losu yapu keneke Akolalike eya kuya mea sipi sipi kai wia lodo yokala taneya. Nitiketeke kini tepene piane wene oyake moa kiyo akatapeamele toameneyea. ¹⁰Opika enika enile tikilepa padeya nee ue eya kekaneya latikoa wawa noamoa padeya moa noa ni tigini eya abe køa tokala tiki. Nipa Akolaliyo eina namolole katekoa wawa wenele yametekaleka papete enika enile pa tekei tokala tiki.

¹¹Keraisu taatekoa nokomepa Akolaliyo ali atoa pewe-kama witikome tokole i wi ka patetekoa yameademe one wene kekakaneya. Nipa ako odene mekome lodo yotokako tobou ago tou toa eni taneya. Nitou wa ali-kitame meme kai tabeme wikakane yapu tuapea ponokome taneya mena. A tibuke yapu eteneya tuapea ponokome taneya. Eniyapa itono patu latia pianeya wane mena. ¹²Nipa Akolali meko lono eni pinikilepa odepeta tuapea penaneyea. Enile wa lokoa toponomoko. Nitoapa meme kai pitimekawe kai tine wia kamate okolo kagonoke mekao aua ponameneyea. Pinali one penane kamate moa aua ponokomepa ali atoa a tibuke mea kamotoa tokome oto toa motaneyea. ¹³Papete panagome tuane agono tigini-kiti mitikoa enile losu kekanele tokalepa nipa Akolaliyo einagopa kekanele toamene ago tetepo takamotoa tokome oneke lodo yotane agome eya taneya. Meme kaika ali kai pitimekaweka wia kamate moa ni atoa kai pitimekawe wia lodo yoa kuku moa einagono tiginike

tadekaneya.¹⁴ Keraisu einagopa pa mea kako Yomini patu kautakoa kakome pinali one kamate ponomotoa tikilepa one tigini Akolalike mea lodo you toa tukome taneya. One poanele padeleka toamokomeke taneya. Nitaneyano, one kamatemete tone tepene pale toateko wene takoa koikakilepa eina papete losu toma nekenele moa patukoa padele akole eni toko. Nipa totome pa mea kama poko ago Akolalinele takama pomotoa tokome ni toko.

Tone Wenele Toateko Totono Yametanemo

¹⁵ Keraisu tukilepa Akolaliyo ali atoa weneya totono lutua yamemotoa taneya. Nipa Akolaliyo one wa kayo oa motokana yenepa one mana kono-mikiti latikoane pewe wiane-kala kawou wa papete oa pikana toa taatekoia tomotoa taneya. Eina namolo totonoke lukoa mekete tokoi poaneleme pine yene kiwi moa labakaneyake Keraisu einago tukome oto toa motokome nitaneya.

¹⁶ Panagome kadimo oka toa moatekoi ali-kitame einagoneya papete moamatekoiyake einago tuadekalepa oyake moamele too. ¹⁷ Panagome-ki kitae kadimo ootokoa tuameneya pa mekomepa nipa onekeya-kama pa pikoa kawoo. Wa einago tukalepa one kadimo oka toa moatekoi ali-kitame onekeya tatia mokala toi. ¹⁸ Edikoapa Akolaliyo Iserele yene kiwi auapekene ile touno dikamene wa one namolo totono yametekome akene toa taatekamotoa tikilepa kini witane sipi sipi kai kamatemete taneya. ¹⁹ Akolaliyo eni totono yametekome tamene wa okana toa-kama Moseseyo i i wa toawea ootokoa kakome eya taneya. Pitimekawe tine moa wia eniya kamate okolo kagonoke mekao ue-pala eletekaneya. Nititikoapa kikome kiane sipi sipi kai pine-pala yomo isope yenene deyata moa okolo kagonoke tadaneya. Nitoapa eni totono wia mekane bokukeka eida kakene ali atoakeka tadekatapeney. ²⁰ Nitikome okome *i kamate kiwike tadekakilepa Akolaliyo lutukoa yametekana totono tele takakene tuku* wa Moseseyo akeneya. ²¹ Einakale toa Moseseyopa meme kai eya tabeme wikakane yapuke kamate tadekoia ni eni yapu keneke Akolalinele takadete latia pikanya peyakeka tadekoia taneya. ²² Opika Iserele yename eni namolo totono litiketepa enika eniya pa natetekoa katekoia eteya peya abe kawamene tetepo taneya pimotoa tekete kamate moa tadekaki. Einakale toa Akolaliyo ali atoame poanele tokoike po letu mekakana kea wamotoa tikilepa kamatemete-kama tiki.

²³ Enika eniyapa Akolalineya a tibuke pia kawa tokoya adeka pia latitikoapa abe kawamene tetepo taneya pimotoa tokome Moseseyo kamate moa tadekamele taneya. Nitamele taneyake a tibuke pikoyakiti abe kawameneya pimotoa tokome eina papete kamate tadekane toa moa patukamedekale Keraisuyo eya taneya. ²⁴ Toto auapekome kowitikademepa Iserele yename wikakane losu yapu pome kapaney.

mena. Eteneya adeka pia pa tekei wikakane yapu poamokome a tibuke etene Akolali mekota pinele pome kapaneya. ²⁵Nitou wa oomotokome pikilepa ako odene mekome lodo yotokako tobou agome toko toa taneya mena. Einagome malikeka sipi sipi kai kamate okolo kagonoke mekamotokome Akolali meko lono wa ibini akene yapu luku aua pokala toko. Keraisuyo pade nitameneyea pinali one kamate Akolali mekata lugutukoa aua poameneyea. ²⁶Ako odene mekome lodo yotokako agome tokala toko toa tamele too tokapa nipa itono latia piane-pete titimoapa lugutukoa tete moa tukala tamele too toka. Nitamele too tokake eya taneya. Itono takoa poateko tigotoma noko wa ali atoame tokoi poanele moa kogataapeademe taateko a nekeneya. Nipa pinali one tigini Akolalike mea lodo you toa tuademe nekeneya. Enakale toademe wapa nikileka toamoo. ²⁷Akolaliyo wene toopiane toa ali atoa toto odepeta tukala too. Tuutukaneyake Akolaliyo takoa enekala too. ²⁸Keraisu einagoka odepeta tukilepa taneya. Nipa ali atoa peya matiyame tokoi poanele kogademe tukilepa pinali one tigini Akolalike mea lodo you toa tuaneya. Wa lokoa nikilepa poaneleke tuademe noamoo. One wakapea nomotoa wedianeya nepia mekoi-kiti toa moademe ni noo.

**Papete Akolalike Lodo Yoma Neketeke One
Wene Kekataapeamele Toamenemo**

10 ¹Moseseyo eina namolo totono yametekilepa Akolaliyo padele padele epetanele naniko taateko a toatekale adeka pia yametaneya. Eni toatekale keleyo yameameneya. Ue mine takane yomini keneya yametaneya. Nitane totono piane toa Yu yenamne malikeka Akolalike lodo yo a kowitima neketeke pine yene kini wene oyake moa kiyo akataapeamele toameneya. ²Lodo yo a enile tokoilemedo edikoa kowitikoi-kitane wene moa kiyo akataapeeo tokapa nipa lodo wa yoamoi toka. Nipa kini poanele moa kogataapeademo wa Akolalike lodo wa yoamoi tokake ³ae, poanele pa toma yakete ni toko wa malikeka lodo yotuku pekete tikili uku. ⁴Ali kai pitimekawe kamatemeka meme kai kamatemeka kini tokoi poanele oyake moa kogataapeamele toamokolo ni uku.

⁵Nikepa Keraisu itonoke noademe mekome Akolali-pala eya wa akeneya.

Atai, kei ali-kitame neke wene kekadetepa sipi sipi kai eya wia ipe nee eya moa mea tikilika neme kote tokolo wake eya toko. Kei yeneketuan pa wa no kawateku tigini latia nodokakapiko. ⁶Kei yenamne sipi sipi kai eya lodo yo a kini poaneleke padeya padeya mea tikili enoake neme ke wa wedia moamoko. ⁷Eni wene tekene nepala eya wane okouna. Akolali neke leneke no i kakene uku. Neke wene pikole toadene nekene ni uku. Nipa neke bokuke nooke papete

*wia mekapiane toane taatekoane tuku wa Keraisuyo etene-pala
akeneya.*

⁸Nipa enimo titikome ikilepa eya wa akeneya. *Kei yename sipi sipi kai
eya wia lodo yoa eya kuya mea tikile neme kote moa wako. Padeya lodo
yoa ni kini poaneleke padeya mea tikilika neme ke wa wedia moamoko
wa akeneya.* Nipa Moseseyo eina namolo totono yametekilepa enile
tamene wa yametaneyake akeneya. ⁹Enimo ootokoa eya waka akeneya.
Akolali neke lenke i kakene uku. Neke wene pikole toadene nekene ni uku
wa akeneya. Nipa Akolaliyopa sipi sipi kai eya witikoile kote tokale
wakome eni luku Kerasu pinali one tigini lodo you toa tumotoa toka wa
Keraisuyo okome akeneya. ¹⁰Akolaline wene pikale eni litia tokomepa
ali atoa toto Akolaline takoa motokome tone tokoo poanele moa
kogatapeneyea. Nipa pinali one tigini Akolalike mea lodo you toa tukome
taneya. Edikoapa wa pade tuamoo.

¹¹Akolalike padeya mea lodo yotiki ali peyame kini losule eni teketepta
ta patako abuna odenele-kama toa sipi sipi kai eya wia lodo yokala
tiki. Ali atoame tokoi poanele edikoa moa kogamele toamokoyake tiki.
¹²Keraisuyo pade nitameneyea. Ali atoame tokoi poaneleke odepeta
one tigini lodo you toa tukome moa kogatapeneyea. Ali atoa peyake eni
tukomepa wa pade tuamoo. Nitoa tuumotokome Akolalimekata nimini
yono lono pome mepaneyea. ¹³Opika eida pa meko. Nipa Akolaliyo ne-
pala poi teiane yene neeke lukoa memotou wa onepala oa pikana toa
taatekoia tomotoa nepia meko. ¹⁴Kerasu pinali one tigini lodo you toa
odepeta eni tukomepa Akolaline takoa motane yene wene kiyo akaneya
meatekoi toa meemoa pomotoa toa peya takaneya.

¹⁵Enilekepa pine ina ina wa Epetane Yominiyo toto wene takakilepa
Akolaline bokuke wia mekane toa eya wa titikome akeneya.

¹⁶Ali Muno agome ukunu, yakamene. *I meteku oi noka-petepa Iserele
yatene nooke lukoa mekete toatikile i i wane lutuane yameou. Nipa
anu eni weneya totonopa kini tepene lukoane kiwi wene takoane tou*
wa Epetane Yominiyo Ali Muno agome okamo wene takakome
oko.

¹⁷Nimo ootokoa Ali Muno agome eya wa okomoka oko.

*Anu totono tetekoa ele kule poanele toa tokoike po letu mekakounapa
keane wakene wene kayapetapeou wa oka wa Epetane Yominiyo
oko.*

¹⁸Ali atoa kini poanele edikoa moa kogatapeneyea meketepa nipa kini
poanele tokoike padeya-kiti wa lokoa mea lodo yoatiki toa mena.

Akolalike Tegetekoa Meatekomo

¹⁹Nikepa anu oya-lawe kipala eya wane ukuno, yakamene. Akolali meko
lono wa ibini akene yapu lukuke pou toa one mekota Yesuno kamate yoto

ludu toto atiki toa pitia pamele tokolo²⁰ mea kama pato wa weneya ka ludu poadete poko. Nipa Akolali meko lono wa ibini akene yapu luku olege taneya tuane mamina Yesu einagome patetoa Akolali mekata pekene toa toto pitia poko. Patetoa pekene mamina wane ukupa one lagotane tiginike uku.²¹ Nika Yesu ako odenemekome Akolalike lodo yotokakago tou toa Akolaline yapulu yene toto talo takoa kakono,²² Akolali kowitadete eya tatoane uku. Odene wene-kama pia ni oneke wedoa wene tuga mea ni tone tepene poane wene takoa pomotoa ue tadatapeneya meou toa mea ni tone tiginika ue epetaneyame abekootapeneya mea Akolalike tegetekoa mepatoane uku.²³ Akolaliyo tou wa oa piane i i wa taateko tomotoa wedianeya nepia meketepa etepea poamato wane uku. Kiwi auapekene dikou wa oa piko agomepa nitou wa oka toa-kama taateko tootapeoono, poapeneyameato.²⁴ Ete oto wa wene mekanali yoa ele kule epetanele toa tatoe wa tone tone oa kamotokateko wene kibutukoa meatoane uku.²⁵ Akolaline losu yatene obokala toatiki toa pade-kitame toake wokino, totome pade nitamato wane uku. Wene weye akanali yatoe wa losu yapu oboai tamene. Ali Muno ago wakapea noateko oi tigotoma nokono, nitato wane kiwi kowitzane uku-ye.

²⁶Keraisu totoke tuanemopa eina niminimo yakoa mootokoake tone namolo poanele tokoonakale pa toomoa pato wado wene pia tokolopa nipa tone tokoo poanele wa kogademepa te tuoo tokolo-pe.²⁷ Nipa abemeaneyatukolo Akolaliyo kipa one-pala poi tejane yeneno, kibu mou wa toe mine moa pitikoa atukoo wa totome piti motaneyameeo.²⁸ Panagome-kiti Mosesene totono mukiti yamea wakale enekete ali takuta tebolo-wame i i wa one eni tanemo toawea okolina nipa koiso yopiane agome einago ela moamokome wia tukamotoa wakeneya.²⁹ Panagome-kiti Akolaline manado paya tetepo takoa wakomepa nipa Mosesene totono wakene agome tete motane toa moa patukoa dika dika toamene tete moo. Weneya totono piane toa ali atoake Keraisuno kamate penaneyake paya tetepo takakale tokome Akolaliyo kibu moapa dika dika toamene tete meeo. Nipa Keraisuno kamatembe einagono wene moa kiyo akaneyake paya tetepo takoa wawa ni pewe-kama witiko Epetane Yomini tegene matoa tea tokale tokome dika dika toamene tete meeo.³⁰ Eya wa akene agopa Akolali tadeko wa totome wene toko. *Panagome nepala poanele tokalepa noanume nami wiane kibu motokouno, neme kibu moameamene* wa akeneya. One bokuke eya wa akinemoka wia mekaneya piko. *Ali Muno agomepa one yatene ali atoa takoa enoa akakala too* wa wia mekaneya piko.³¹ Ae, tuameneyameemoa poko ago Akolaliyo ali atoa dekoamoa kibu motikilepa piti tanele toa toono, enile takaya wa piti motaneyameamene.

Poapeneyakamene

³² Kiwi pa takaloganemo Akolalinemo papete yakoa mootokoake mekete ele kuleme ke enekakale meake pa poapeneyamekoina wene kibutukoa

meamene. ³³Nipa padepete-kiti pade-kitame kipa ali atoane lene yoto moa kakakete tegene matoa tete mea tokoi. Ni padepete-kiti dikane tete motokoi-kiti wene weye akato wa eni yene-pala kibutua kakoi. ³⁴Ni po yapu moa pitikane-kitipa ela moa auapekala tokoi. Ni pade-kitame kinikiya odomoa pokolika a tibuke kinikiya odoa moa poamatikiya etene epetaneya pa pia kakale enoono, tokamota wa wene epetaneyamekoi. ³⁵Keraisunolepa widikoa atiki toa takama yakoinano, onekele takoa wawameamene. Ataine take nami wia epetaneya-kama meoo tokolo ni uku. ³⁶Ele kuleme ke enekakale meketeka one wene pikale-kama toa togamene. Nitikolipa Akolaliyo one yene auapekene dikou wa oa pikana toa taatekoia tokome pewe-kama wia kawoo. ³⁷Nikepa Akolaline bokuke Akolaliyo akene toa eya wa wia mekaneya pikono, yakamene.

Eya toateko tigotoma noko. Eina noo wa papete oa piane ago noademe toko. Nokomepa pepe meameneywa wete noademe toko. ³⁸Wene kiyo akeneya meko agopa nipa nooke wene tuganeyameemoa poo. Nitateko agomeke piti motokome pegene kakoa no tewitikoa wakalepa makutukoane moamou wa wia mekaneyapiko.

³⁹Anu oya-mikiti totopa pegene kakoa Akolali tewitikoa wawa atuateko yene mena. Akolalike wene tuga meato wa toa motaneyameko.

Namolo Ibini Akene Ali Atoa Akolalike Wene Tugoa Meanemo

11 ¹Akolalike wene tuga mekilepa nipa Akolaliyo papete oa pikana toa taatekoia tokale enou wa totome wedianeyaneipia mea toko. Nipa one yameatekoya-kiti opilene enamukuyake nani enou wa wene tuga meko. ²Namolo namolo papete tone kaua-mikiti oneke edikoa wene tuga mekoikepa Akolaliyo kei pia kakeneya.

³Oneke edikoa wene tuga meketepa eya wa wene toko. Itono tituba ludu pia kawa tokoya peyapa Akolaline agaleme-kama witakakala taneya. Nipa enika eniya peya tone leneme enekoya-kiti eni latikilepa tone leneme enamokoya moa latia pianeya wa wene toko.

Ebele Inoketa Noa Toa Akolalike Wene Tugoa Meanemo

⁴Ebele Akolalike wene tuga mekome tokome oneke padeya mea lodo yotikilepa wamene ago Keine moa patukoa lodo yoa epetekaneya. Oneke wene tugakome eni tokale enekome Akolaliyo one kei pikilepa poanele toamene ago tetepo takoa taneya. Ebele einagopa namolo papete wia tukaneyake tone Akolalike wene tuga mekete toatekoole eni yamepiyaneya.

⁵Eya ago Inoke Akolalike wene tuga mekome tokake i ago tumotoane wamuku wa Akolaliyo a tibuke moa pekeneya. Einago edoa pokato patu wa ete yename tuku toa kawa teko tokale wakeneya. Akolaliyo moa pekeneya tokome enamuameneya. Enilekepa Akolaline bokuke eya wa

wia mekaneya piko. Inoke einagopa a tibuke wete poameneyake Akolali wedikaneya.

⁶ Akolalike wene tuga meamoko agomepa Akolali wedikakile tamele toamoko. Akolalike tegetekoane mepou wa wene piko agomepa eya wa wene toko. Akolali wa iki agopa nimini meko. Ni agomepa one tuku toa meki-kiti pewe wia kako wa wene toko.

⁷ Eya ago Noa Akolalike wene tuga mekome eya taneya. Akolaliyo papete pubu oopiane toa wete taatekameneyake one yapulu yene toa moademe ue dipi wane latipianeya. Edikakilepa ete ali atoa kini poanele toa mekoile Noayo pitigamu taneya. Nitaneyake einagopa nooke wene tuga mekono, anu mati moane latikou wa Akolaliyo poanele toamene ago tetepo takoa yopianeya.

Eberame Akolalike Wene Tuga Meanemo

⁸ Eberame einago Akolalike wene tuga mekome eya taneya. Akolaliyo ta pade nee yameouno, wini ta toa poano pa wa kayo okalepa nitouno ta wa pegetoa poamene take toa pekeneya. ⁹ Nitaoapa Akolalike wene tuga mekome eyaka taneya. One eni yametane takepa mone take mepou toa monekago tetepo taneya pome mepaneya. Nipa meme kai eya tabeme tekei yapu wia yawa pitikilepa mana Aisake kaua mati Yekobeta-pala opia yawa pitaney. Akolaliyo eina ta Eberame yametekilepa einakagota kikilikoa kini wa yamepianeyake edikoa odeneka yawa pitaney.

¹⁰ Eberame nitima yakilepa Akolaliyo wene kibutukoa mea latiane take wipitikene pone mepou wa taneya. A tibuke pia-kala kawateko taake uku.

¹¹ Ni Akolalike wene tuga mekome Eberameyo mana Aisake opianeya. One ada toa mea natono Sera tiobo atue deya mea tekete mati opiamele toameneyake kitame mati opimotou wa Akolaliyo oa pikana toa etene taateko too wa wene tuga mekome mati opianeya. ¹² Einago ada toa tuateka ago oneke-kama Iserele ali atoa ege egeta wa-kala kadukoa tama nekeneya. Nitaneyake a tibuke kako tagoi ni kusa ue matanu piko ue kibi pia toa tama nekene matiyame wa oi moamele toameney.

¹³ Eina namolo ali atoapa Akolaliyo kiwi auapekene dikou wa oa pikana toa nimini taateko too wa oneke wene tuga mea tuma-kala nekeneya. Nipa keleyo taateko tokale enameketeketake padeka mati kakete nami enou toa keneya ke wa enoa moa tukala taneya. Nipa kipa itonoke pa tekei meateko yene wa monekali atoa tetepo taneya mea tukala taneya. ¹⁴ Opi enika enimo iki yenamewa itonopa kini pine ta mena wa ekete iki. Nipa kini pine ta pa tuku tokoa kako wa ekete iki. ¹⁵ Nitane yene kini wenepa kini mea togane take pimotoa note kepene pa meoi tokapa nipa eni take wakapea pamele tokale poi toka. ¹⁶ Nitoi tokake kini eina take wene piitikameneyake mekete a tibuke latiane ta epetaneyake wene piitikaneya meaney. Nitaneyake Akolaliyopa eni yenamewa onepa

kini Akolali wa kei pia okoli yatekaya wa ya motokoya mena. Kini mea kama poatekoi taapa oneme latia pikaneyea tokome ya motokoya mena.

¹⁷⁻¹⁸ Eberame Akolalike wene tuga mekome eyaka taneya. Akolaliyopa mana Aisake moa oneke lodo yamene wa Eberame-pala ikilepa papete *Aisake einagoke neke ti ali atoa ege egeta kadukoa t̄ma poi* wa oa pianeyake akeneya. Oneke wene tuga mekome tokale tetoa enademe ni okale Eberameyo nitouno ta wa mana Aisake moa lodo yoademe taneya. One peku mati odene agoke taneya. ¹⁹ Nipa Akolaliyo tuane alika oyake moa kamotokamele toko wa wene kibutukoa mea yoademe taneya. Nitademe tokale enekome Akolaliyo oyakeno wa wa ketekakome tuane ago moa kamotokou toa mana Aisake Eberame ete wa metekome metaneya.

Aisake Yekobeta Yosepe Toa Akolalike Wene Tuga Meantem

²⁰ Aisake einago Akolalike wene tuga mekome eya taneya. Manata Yekobe Isota kini mea epetekatikile i i wa kinita wedoa meatekoi agale oa pianeyea. ²¹ Ni Akolalike wene tuga mekome eyaka taneya. One tuateka tigotoka-pete Yosepene manata takuta wedoa memotoa tokome agale oa epetekaneya. Nitapa iti tigine kakome Akolalike nate wene pia kowitaneya. ²² Ni einago Yosepe one tuateka tigotokale mekomepa Iserele yene Idipi ta toa poatekoimo i i wa oa pianeyea. Nipetepa one tono-pala aua pamene wa oa pikilepa Akolalike wene tuga mekome akeneya.

Moses Akolalike Wene Tuga Meantem

²³ Mosesene etene nineta Akolalike wene tuga mekete eya taneya. Idipi ako odene meane tobou agomepa Iserele yene kini pene opiane ali mati peya wia tukamotoa akeneyake eina adoname one akenemo piti moameneya meaneya. Nipa mati opia pikete enekoli koniyo mati tadeko wa eneketepa tokene teboloke potipianeya.

²⁴ Moses Akolalike wene tuga mekome eya taneya. Wetiniya kakomepa Idipi ako odene meane ago Perouno kono kamo atoane mana wa ibini amene kote tokale wakeneya. ²⁵ Nipa Idipi yene kini kolotini natekaneleke wene piitikaneya mea etepea poanele toma pokiole pa tekeika litia toamademe wakeneya. Nitapa Akolaline yatename tete motiki toane onemeka mou wa kipala kibutua tete motaneya. ²⁶ Ete-kitame one tegene matoa poanemo okolika naniko taatekaoa noatekago Keraisuke toa eni tete motaneya. Nipa Akolaliyo one kamo takou toa pewe wimotoa nepia mekome Idipi yenane kamoya paya tetepo takoa wakeneya.

²⁷ Nitapa Akolalike wene tuga mekome eyaka taneya. Idipi ako tobou ago Perouyo tete metekaya piti moamokome Idipi ta toa pekeneya. Nipa leneme enamateka ago Akolali one-pala opia pokale enane tetepo takoa wakeneya.

pekeneya.²⁸ Ni Akolalike wene tuga mekomepa edelo ago patukane wa ibini akene toge yopikome Iserele yene-pala eya wa pubu akeneya. Akolaliyo Idipi take moa wetekateko edelo ago kini kini meki yapu patukataapea pomotono, sipi sipi kai kamate kagoke tadekamene. Kini namolo takoa opiane ali mati yatene wia tukakayano, nitamene wa pubu akeneya.

²⁹ Ni one Iserele yene Akolalike wene tuga mekete Kiane Kusa Ue ketakilepa itono matanu ludu pou toa ketoa pekeneya. Nitikoli Idipi poyo yene kiwika ketoa poo wa muke litimoa pokoli ueme atukatapeneyea.

Ete Yene Akolalike Wene Tuga mekete Tanemo

³⁰ Ni Iserele yene Akolalike wene tuga mekete eya taneya. Kue pawe kago unukataapeane Yeriko ta pitikaline taapa ta pataka tatono (7) kakoapeta kawa pitikoa yawa unukakala taneya. Nitaneyake eina pawe kago bu wa kilikatapeneyea. ³¹ Nipetepa pamoko atoa Reabe Akolalike wene tuga mekomepa ete Yeriko yene Akolaline agale tagoa toamene yene-pala deko tuaneyaya mena. Papete Iserele ali takuta poi katepa teja Yeriko take nokoli enekome one yapu noe wa makutukoa moa potipikanake Iserele yename one wateaneyaya.

³² Ina ukuna toane pa okoane piane-pe. Eya ali-kiti Gidione ni Barake ni Samesone ni Yepesa ni Depidi ni Samuele ni Akolaline agale papete toawea akane ali-kiti enika eni ali peya mati Akolalike wene tuga mekete tokala tanemo oateku pake piamoto. ³³ Nipa Akolalike wene tuga meketepa eya toma-kala nekeneya. Pitikali-pala poi toa moa kawikoa ni kini yene talo toa epeteko ni Akolaliyo papete kiwi auapekene dikou wa oa pikana toa taateko tokale enoa ni laione kai moa kawikoa atiki toa mea ³⁴ ni tube toe mineke moa pitikaneya kakete toe tuga moa ni tueme kagoiyake petoa pote ni taba taneya meake popeyo nokale telekole toa ni pitikalime poi toma nokolika poi lene kianeya kakete ete pedekoa lititapea taneya. ³⁵ Ni pade atoa-kiti Akolalike wedoa wene tuga mekoli kini mati tukala taneyake moa kamotokaneya.

Ni Akolaline totono litia toamene yename pade-kiti po yapu moa pitikakete ekete Akolalinele takoa wakolipa kini yapu wetekoo-koli ekete tuake kamomotekete a tibuke mea kama poono, nitamoo wa tete mokoa kawa tukala taneya. ³⁶ Ete yenamepa pade-kiti tegene matoa ni po wapime wia ni pade-kiti po yapu pitikou wa kapa po kakoa ³⁷ ni pade-kiti kue pitikoa wia k^aua ni pade-kiti soome t^eitakutukoa ni pade-kiti tueme k^awa tukoa taneya. Ni pade-kitipa pa ponopene ali atoa sipi sipi kai meme kai eya tabeme latiane mamina kakeneya yawa pitaneya. Nipa ele kuleme ke enekakale mea tete moa yawa pitaneya. ³⁸ Enika eni yene ali piamene ta luduka tono tono kakene ta luduka kota kene pikokaka koa kene pikokaka yawa pitaneya. Eni yenamⁱkiyo akenele toma yakete tekete ete ali atoa-pala opia meamele toameneyea.

³⁹Dikane yene peya Akolalike wene tuga mekete taneleke kei pianemo one bokuke wia mekaneyake kiwi yatene auapekene dikou wa papete oa pikana toa taatekoia tokale enameneya pa mea tuma-kala nekeneya. ⁴⁰Ni edoa-mo. Akolaliyo eni yene auapeateka wene toopia mekomepa ipete meko-kiti toto peya odene kikilikoa auapekene auapeou wa wene toopianeya. Nipa toto peya mea epetekateko kotu kakoa memotoa tokome one namolo wene toopikanakale moa patukoa padele akole toateka wene toopianeya.

Toneketai Akolaliyo Toto Mane Oa Motoko

12 ¹Ali atoa peya mati Akolalike edikoa wene tuga mema-kala nekeneya. Nitapa opi toto ipete meko-kitipa edoa meki patu wa wedo pia unukatapeou toa kakete enekete tiki. Nitikete tikino, eni yene meane toa meato wa teyapea moa patukanali you toa eya tato. Ele kuleme ka ketekakoya peya tewitikoa wato. Nipa tone poanele tokoleme toto lakabele takakoya-kiti wawa tone poatekota pitimoa pato. ²Nitato wa Yesu enekoa patoane uku. Yesu einago Akolalike wene tuga mea tagatapeneyano, one pitia patoane uku. Yesu einagome wipitikenepa kolotine meou wa wene toopianeya tokome eya taneya. Yomo lekaneyake wia dekaneya kakomepa ete yename tedu mea ya motokoa tomotoake ko wameneya tuaneya. Nitoa tuumotokomepa Akolali meko walai waneke nimini yono lono pome mepaney.

³Ae, poanele tane ali-kitame one kote motekete ele kule toa tete memotoake ko wameneya poti mekome tanele wene taneya meamene. Kipa tepe we taneleke pitime tuku wa Akolalinele takoake wakaya tokolo ni uku. ⁴Akolalike wene tuga mekete ele kule poanele ete pedekama nokoli kiwi padeka wete wia tukameneyano, onekele edoa takoa wawadete-pe. ⁵Akolaliyo kipa one mana kono-mikiti latikoa mama motokome oa pianemo one bokuke wia mekaneyake wene kayapetapea meki-pe. Eya wa akeneya.

Anu mana nepala ukumo yakamene. No Ali Muno agome ne kibu motekene mane oane motokoumo pamo tetepo takameamene. Ni ne kikoane akakolupa no i agonole edeya weike takaku patu wa wene keda taneya meameamene. ⁶Anu kolotini yene kikoane akoane ni anu mana kono-mikiti latikoane yopiku-kiti kibu moane tuku wa Akolaliyo akeneya.

⁷Nitaneyano, ke enekakale mekoi-pete-kama inapa Akolaliyo nopa one mana tetepo takoa mane oa moa tadeko wa ko wameneya meamene. Etename-kiti one matiyame poanele tokolopa kibu moa mane oa moa toamoko patu. ⁸One mana-mikiti talo toapa peya kibu moa mane oa mokala too-li. Akolaliyo kiwido mane oa moamokomepa nipa one mana-mikiti tetepo takamokome pakale mati-kiti tetepo takakome too. ⁹Itonokepa toneketai-laweme toto peya

kibu moa mane oa mokala tokoi. Nitikoli kote tokolo yakoane moamuku wa wamekete kiwi kei pia kakoo. Nitikoono, toneketai a tibuke mekome toto mea kama pomotoa mane oa motokolopa yakoa moamoko patu. Etene yakoa moo-li.¹⁰ Toneketai-laweme kibu moa mane oa motikilepa pa tekei tokoi. Nipa toto auapeatekoi wene kibutukoa mea tokoi. Akolaliyo toto mama motokome kibu moa mane oa motikilepa one wene kiyo akanaya meko toa memotoa tokome toko.¹¹ Edikoa kibu motokoloka inapa tone wene keda takanele witako wa wedia meamoko. Wa naniko kibu moa mane oa moa togakale yakoa motokoi yenepa witi *kū* tumia witakome *kū* wedoa tuou toa itonoke tepe kolotini kilikoa pimota wene kiyo akanaya meoi.

Mane Mane Oa Pubu Oa Tanemo

¹² Nitaneya meoino, yono kawa weye wameneya meou toa Akolalinele wedoa takama poamiki yenepa kini yono kawa weye akanaya mea onekele wedoa takama pamene.¹³ Kawa okeaneya yawou toa Akolalinele wedoa takama yawamiki yene paka pokaya tokolo kini poatiki ka kiyo akoa nodokakapiamene. Kini kawa epetekou toa tekete Akolalinele takatikile i i wa yameamene.

¹⁴ Yete pade ali atoa-pala odene wene pia enekala tamene. Ni wene kiyo akanaya mea epetanele toadete wili toma pamene. Edikoa meamoko agomepa Akolali enekile toamoko.¹⁵ Kiwi padeka-kitamepa Akolaliyo ali atoa pewe wia talo tokota petekatapekayano, wedoa yamene. Ni kiwi ete oto wa wene poaneyea memotoa tokoyapa kiwi pakeke witakome peya matike weamutukayano, wedoa meamene.¹⁶ Ni pamoko mea enile poanele takayano, wedoa yamene. Ni itono peku-kama nakene ago Isoyo tane toa toameamene. Iso einago namolo ago tokome etenaneya pine wia moatekoyake kobu tokale meane-pete etene luku kakome moatekaya-kiti paya tetepo takoa eya taneya. Wamene ago Yekobene nee moa noademepa one eni moatekaya-kiti topo toopia wakeneya.¹⁷ Wa naniko Akolaliyo one pine wia pewe wimotono, kowitikamene wa Isoyo etene Aisake kowitaneya. Komo oa kowitoa kawake one eina namolo tokanakale oyake moa koikamele toameneya. Enipa nimini uku-pe.

¹⁸ Opi kimepa Akolali kakakoa kowitikilepa tone kaua-mikiti kini Kati Sainai kakoya liti kakete tane toa tikiya mena. Einapete Kati Sainaika toe itipono okoa kakene matiyameke yomiyomume agopa takoa pupulege mati popokoa tokale tepene piti wia lukaneya yakoa kakeneya.¹⁹ Nitoa yatekoli bera pia agale ludu oa tokale yatekete ekete agale oyake yatekoono, wa-ye wa tone kaua-mikitame kowitoa kakeneya.²⁰ Nipa agale ludu nokome okome *kiwika kini pitimekawe kaika i tono kakoya liti nokolipa kue pitikoa tukamotoane ukuno, noameo* wa Akolaliyo okale pitime tuaneyea kakete kowitaneya.²¹ Moseseyoka piti tanele enekene kolu kolu motuku wa piti mea taganeyea kakeneya.

²²Anu oya-lawe kime Akolali kowitikilepa Kati Sainai kakoya liti kakene tetepo takoa tikiya mena. Opa Kati Saione note kakene tetepo takoa meki. Nipa Akolaline edelo ali ege egeta wa-kala kadukoa koukoa wedia mekika nekene tetepo taneya meki. Kati Saione wane ukupa tuameneya meemoa poko Akolaliyo a tibuke latiane Yerusalem take uku. ²³Nipa one namolo mana kono-mikit i kini ibinipa one a tibuke piko bokuke wia mekanekiti koukoa mekika pote mepane tetepo taneya meki. Ni ali atoa takoa eneko ago Akolali mekota ni wene moa *kiyo* akane yene a tibuke mea epetekatekoi kotu kakoa mea epetekaneya mekika pote mepane tetepo taneya meki. ²⁴Ni Akolaliyo tone wenye totono yamemotoa tokome tuane ago Yesu one mekota meane tetepo taneya meki. Nipa one kamate kiwike tadekaneya meki. Yesu einagono kamate ponokomepa eya ago Ebelene kamate ponokome tane toa moa patukoa etenane wene kekakaneyea.

²⁵Kiwi mane oa motoko ago Akolaliyo okamo yakoa moamokayano, wedoa yakamene. Papete itonoke Kati Sainaike agale ludu nokome okale kini kaua-mikitame yakoa moamokoli Akolaliyo yono lukoa meamokome kibu motaneyano, opi a tibuke mekome i i wa toto pubu okale yakoa moameketepa nipa edoa petoa pato-pe. ²⁶Papete Akolaliyo agale ikilepa itono muku takoa akeneyake opi eya wa pubu oko. *Wa padepete itono moane muku takakenepa tibuka odeneka moane muku takouno, nepio* wa oko. ²⁷Padepete wa ikilepa one moa muku takatekoya eya kuya oneme latia pianeya-kiti takoa pomotou wa okome oko. Muku takamatekoya-kiti pa pia kamotoa tokome nitoo.

²⁸Muku takamatekoya-kiti wa ikilepa Akolaliyo toto oneke lukoa memotoa talo toa-kala kawateko ta eni yameademe okome okono, ke wa one kowitoa meateko toa oneke nate wene pia piti-pala moa kowitzatoane uku. ²⁹Tone Akolaliyo poanele tiki ali atoa kibu motikilepa toeme nootapeou toa kibu moa atukoo tokolo ni uku.

Akolaline Wene Epetekakete Toatekomo

13 ¹Anu oya-lawe kini kini ame wa wene mekanali yotekete tiki toa wedoa toomoa pamene-ye. ²Monekali atoado kiwi mekoika nokolipa nee noatino noe wa makutukoa moamene. Namolo namolo pade ali-kitamepa Akolaliyo moa wetekane edelo ali-kiti makutukoa motikilepa i agopa edelo ago tadeko wa wene toameketek tokala taneya. ³Ni po yapu pitiki yene wene kayapeameamene. Kiwika po yapu odeneka pitane tetepo takoa mekete eni yene ugu pote kini wene weye akapokala tamene. Ni tete mokoa kaki-kitika wene kayapeameamene. Kimeka tete mokoa meane tetepo takoa mekete ela moa auapekala tamene.

⁴Ali atoata adona mekilepa Akolaline leneke *kiyo* ootokoa-kama meamene. Nipa mone pade ali atoa koua piameamene. Koua piamatiki ali atoa koua pikolipa Akolaliyo kibu moono, toameamene.

⁵ Ni kueke-kama wene piitikaneya meameamene. Kinikiyapa oyake piko wa tepe keaneya meamene wane uku. Akolaliyo *kiwi tewitikoane wakilepa toamou* wa akeneyake ni uku. ⁶Akolaliyo nimo akeneyano, totome eya wa amele toko.

Akolali einagopa no auapeko agono, ete-kitame nopala poanele tokolekeka piti moameneyea meou wa toto atiki toa mekete amele toko.

⁷Eya ali-kiti kiwi papete talo toa mekete Akolalinemo olaukane ali-kiti wene taneya meamene. Kini Akolalinele takama pote tuanemoka wene taneya meamene. Nitoapa kini Keraisuke-kama wene tuga mekete tanele kotukoa mea epetekamene. ⁸Yesu Keraisu epene wene-kama piko agopa one eni wene wia wakilepa toamoo. Namolo namolo opi opi naniko naniko epene wene-kama pianeya meko. ⁹Pade-kitame emo kumo monekemo titia okoli kime yakoa etepea pokayano, yakameamene. Toto pewe witikome wene weye akakago Akolaline tele patu kautakoa kama pato. Pade-kitame nitameneyea padeya nee kekaneya latikoa wawa ni padeya takoa noa tikilepa pata pale tikino, enile toamato.

¹⁰Keraisu pinali one tigini lodo you toa yomo lekaneyake tukilepa toto toa moademe taneya. Meme kai tabeme wikakane yapu keneke kakene tetepo taneya kakete Akolalike lodo yotokaki ali-kitame sipi sipi kai wia lodo yoteketeka toto-pala oyake lipua meamele toamoko. ¹¹Ako odene mekome lodo yotokako ago Akolali meko lono wa ibini akene yapu luku pikilepa ali atoa peyame tiki poaneleke sipi sipi kai eya wia kamate okolo kagonoke meko aua poko. Nitoapa eni sipi sipi kai tigini moa ta ketepono patukoa pome akolono yopoko. ¹²Enile tou toa Keraisu tukilepa ali atoa pitikoika eko pimota ta ketepono patukoa pome akolono tupaneya. Nipa ali atoame tokoi poanele kogatapeademepa one kamate ponomota tuaneyaya. ¹³Nitaneyano, ta ketepono patukoa akolono one ya takoa wia dekaneta pote kapou toa one-pala dekoa ya tokale meato. ¹⁴Itonokepa tone meemoa poateko ta piamokoyake weneya take pia kawateko take meemoa poadete toko wa nepia meko. ¹⁵Nipa Akolaline wene kekadetepa oneke padeya mea lodo you toa tekete Yesu patu kautakoa kakete Akolali kei pia-kala katoane uku. One ibini wedekoa nitikala tato. ¹⁶Nitoa epenele-kama toa kinikiya-pala tatiamekala tamene. Nitikolipa Akolaliyo enipa oneke padeya mea lodo yotane tetepo takoa wedia meeo.

¹⁷Kiwi talo toa meki-kitame tamene wa okoi toa litia tikilepa kiwike poti lukoa mea tamene. Kipala padele takaya tokale talo tikilepa eya wa wene taneya mea tiki. Akolaliyo ali atoa takoa enekomema eni yene kime talo toa epetekakoi-pe wa pitia yakoo wa wene taneya mea tiki. Kini kolotini toaneyaya mea talo tomotono, tamene wa okoi toa litia tamene. Kini wene keda takaneyaya meketepa kiwi edoa talo toa auapemota-pe.

¹⁸Totome ele kule tikilepa ete-kitame padeya namike akoa oatikileka toamoko. Tone tepeme tamene wa oa epetekako toa-kama toko.

¹⁹Kiwi mekita wida wete wakapeane nomotoa tekete Akolali wedoa kowitikakala tamene.

²⁰Ali atoa tone tepe kolotini kilikoa pikako ago Akolaliyo tone Ali Munu Yesu tuaneya pikale moa kamotokaneya. Nipa ali atoa toa moateka oi pedoa piane totono pa pia kako totono tele takakome one kamate ponomotoa tuaneyake moa kamotokaneya. Nitaneyano, kipa one sipi sipi kai wa ako odene mekome toto talo toa-kala meko. ²¹Nitikono, Akolali-pala eya wane kini kowitikoane uku. Eni yename neke wene pikole-kama tomotono, ele kule toa epetekatiki peku lawetetapeamene. Nipa neke kolotini nakeneya memotoapa Yesu Keraislu patu kautakoa kakete epetanele-kama tomotono ta wane Akolali kowitoane uku. Keraislu einago kei pia-kala kama patoane uku-ye. Ee nimini.

Wipitikome Akenemo

²²Anu oya-lawe kiwi mama motekene mane mane ikilepa pa tigini wane wianemekakene ukuno, panagome moa oi motokakalepa poti yakakoa meamene-ye. ²³Tone oyago Timosi po yapu pitaneyake yopiko agome ne pa wa po kotokoa wetekaneya. Einago no i mekuta wete nokalepa nipa kiwi mekita pata wane one-pala wida opiane nou.

²⁴Kiwi talo tiki yene peya ni Akolaline ali atoa peya poti meamene wa akamene wane uku. Kini oya-lawe i Itali take pitiki-kitameka kiwi peya wete meamene wa iki-ye.

²⁵Akolaliyo kiwi peya pewe wia yopimotoane kowitikoane uku-ye.
Opa anu agale eni.